


Parlament tracta intervenziuns persunalas

L'iniziativa da chatscha vegn spustada sin l'auter onn

■ (anr/rgd) L'ultim di da la sessiun d'october ha il cussegl grond tractà diversas intervenziuns ed incumbensas persunalas. Tranter auter ha il parlament grischun spustà l'iniziativa dal pievel chantunala «Per ina chatscha etica e cumpatibla cun la natira». Cun 103 encunter sis vuschs ha decidì il cussegl grond da spustar la discussiun davart l'iniziativa sin l'october da l'auter onn. L'Uniun per la protecziun da la selvaschina en Svizra ha lantschà l'iniziativa en il Grischun. Quella suggestiun d'ina vart ils adversaris da la chatscha speciala, vul dentant cuntanscher anc dapli ed abolir las «metodas da chatscha antiquadas e nuschaivlas per la selvaschina en il chantun Grischun». La chatscha duai daventar pli «umana» e prudenta e respectar ils basegns da la selvaschina. «La fevra da chatscha va dapi ditg en ina direcziun adina pli brutala ed irresponsabla», è l'avis da quell'uniun, «selvaschina n'èn betg animals da nìz u trofeas da chatscha.» La chatscha servia uschia sulettamain ad in hobi ch'è n'ha ja da far nagut cun la tgira da la selvaschina. La selvaschina tutgia a tut las Grischunas e Grischuns, fetschia plaschair a noss giasts e na dastgia betg esser mo object dal hobi da chatscha. «Novas enconuschientschas mussan tranter auter ch'in squitsch da chatscha augmentà ha per consequenza ina reproduziun pli auta.» Perquai pretenda l'Uniun per la protecziun da la selvaschina ina diminuiziun dal squitsch da chatscha.

Iniziativa cun restricziuns severas

Concretamain pretendan ils iniziants la realisaziun dals suandants puncts: vavgas tscharva purtantas e chauras chavriel cun lur pitschens duain vegnir protegidas generalmain. Traplas ed il pavarlar



Il cussegl grond ha spustà la tractaziun da l'iniziativa da chatscha sin l'auter onn.

FOTO M. HARTMANN

selvaschina duai vegnir scumandà. Tut las sorts d'utschels duain giudair ina protecziun absoluta. Il ruaus d'enviern general per tut la selvaschina duai durar dals emprims da november fin a l'entschatta da la chatsch'auta. Plinavant vulan ils iniziants introducir per chatschaders ils medems cunfins d'alcohol sco fixà en la lescha da vias. Medemamain sco tar la lescha da vias vulessean ils iniziants introducir in'examinaziun periodica da l'abilitad da l'arma e dal tiradur. Plinavant duai vegnir utilisada be pli muniziun senza plum. Uffants fin a dudesch onns na duain betg pli pudair accompagnar chatschaders. En scola na dastgan els betg vegnir motivads per la

chatscha. Tar donns extraordinaris pon ils guardiachatschas ordinar ina regulaziun unicamain sche tut las mesiras da protecziun imaginablas na mainan betg a la finamira.

Tractà las ultimas intervenziuns da la sessiun d'atun

A la fin da la sessiun d'october ha il cussegl grond anc tractà diversas intervenziuns persunalas da deputadas e deputads. Sin iniziativa da deputada *Angela Casanova-Maron* (pld, Razén) surprena la regenza l'incarica da procurar ch'il chantun tegnia en egl il svilup da la pussaivladad da's laschar vaccinar directamain en in'apoteca. Cusseglhier governa-

tiv Christian Rathgeb è conscient dals ristgs ch'existan en quest connex. Tematisà è ultra da quai puspè vegnì il sviament da la citad da Cuira sin la via vers Arosa cun ina punt da colliaziun da Son Gliedi ad Araschgen. L'incumbensa d' deputà *Ernst Casty* (pbd, Cuira) d'integrar la punt en il program da vias 2017-2020 è vegnida surdada a la regenza dal parlament cun 108:4 vuschs e trais abstenziuns. Nagina schanza ha perencunter gi l'intervenziun da *Rico Stiffler* (pbd, Tavau) per in tunnel da viafier tanter Tavau ed Arosa. Il parlament n'ha betg surdà questa intervenziun a la regenza e l'ha sbittada cun 77 cunter 34 vuschs e quatter abstenziuns.